



Kurdocide Watch

ORGANİZASYONA MAFÊ MIROVAN YA LI DIJÎ JENOSÎD KIRINA GELÊN KURDISTANÊ

Encama Konferansa Dersimê ya li Stockholmê

Êşa Dêrsimê didome...

Ev rastî, ji axaftin û keserên şahidê jenosîda Dêrsimê Elî Gultekin dikare baş bê fêmkirin. Ji hizirkirina kûr û analîza parlementerê Dêrsimê Şerafettîn Halîs ku hejmarek kes ji malbata wî şehîd ketine, baştir tê îfadekirin. Evîn Çîçek ku bi dirêjî lêkolîn li ser qirkirin û pirkûjiya Dêrsim û Koçgîriyê kiriye û bi xwe ketiye ber pêla nefîkirina dewletê, dikare baştir vê êşê bihêne zimên. Lawkê Dêrsimî Kemal Gorgu bi qirîniya li ser nîgargehê, bi rêya şanoya xwe bû dengê şehîdên Dêrsimê û hewil da ku êşa Dêrsimê, bi rêya hunerê bihêne zimên. Wî baş anî zimên ku Dêrsim çima digirî?

Birîna Dersimê kur e, êşa qirkirinê mîna dûhî îro jî didome...

Konferansa Dêrsimê li Stockholmê ku di 24 Çileyê Paşîn 2010 de pêk hat, û ji aliyê Kurdocide Watch ê hatibû organîzekirin, li ser êş û birînek me, dengê & rengê netewî, û hevkarîyê xwezayî pêk anî û bi saya dostên Kurda bû cihê niqaşên balkêş û berdwama kampanya û niqaşek navnetewî.

Çend dîmenên cewaz ji konferansê

Ciwan Haco, bi "Dersim Welatê ma yo" heyecanek netewî da beşdarên konferansê. Îdeolojî û alîgirî bi şeweyekî nerm û xwezayî cihên xwe dan hevkarîyê xwezayî û hîsên Kurdayetiyê. Kêfxweşiya dostan bi hîs û helwestên me yê netewî derketin berepêş û bilind bûn. Dengê Ciwan bandorek mezin li guhdaran kir, hêsir û hîsên me tevlihev bû...

Serokê Komîteya CHAK Bakur Seyidxan Anter bi axaftina xwe, ji pirkûjiya Cuhûyan li Elmanya derket rê û xwe gihand qonaxa jenosîda Dêrsimê. Siyaseta Turkiyê rexne kir, qonaxa nû ya girtina DTP ê operasyonên li dijî dezgehên demokratîk yê Kurda anî rojevê. Anter ji beşdarên xwest ku pirsê cidî bigirin...

Dîtina pisporan

Turkiye dikare bandora xwe bi rêya berjewendiyên cewaz û hevbeş li siyestvan, partî û dezgehên navnetewî û hetanî cihê li dewletan bike. Lê ilm, dezgeh û kaniyên zaniyariyê nikare heta hetayê çavê xwe ji rastiye bide guhertin. Delîl û ispata herî mezin axaftina du kesan, Profesore Dîrokê David Gaunt û doktorê dîrokê Hâkan Blomqvist bû.

Gaunt wisa axifî:

"Dêrsim çî caran serî netewand. Azad bû û cihê xwe serbixwe bû. Dêrsimî kaniya serhildêran ya netewî bû her wisa cane gelek kesên mesîhî, ermenî û aşûriyan ji mirinê rizgar kirin. Rejîma Kemal mîna hercar bi xwe ya slogana (xapînok) "ji bo pêkanîna medeniyeta sivil û rizgarkirina civatê ji destê feodalan" derket rê. Devera Dêrsimê bi hêzên mezin hate pêçan. Qanûnên taybetî derêxistin. Dêrsim ji ezmên ve bi balafiran hate bomberanakirin. Zarok, jin, pîr, mêr û jin, hemû kes ketin ber êrîşa wan. Jenosîd pêk hat."

Hâkan Blomqvist wêneyên balkêş ji dema jenosîda Dersimê da: "Dema ku Turkiyê li Dersimê dest bi oprasyonên leşkerî kir, cîhan bi xwe û problemên pîralî mijûl bû. Buyerên li Dêrsimê

pêk hat çî caran nehate zelalkirin û li Swêdê jî nebû cihê niqaşan. Divê buyerên wisa û buyerên hatine sere kurda neyê jibîrkirin. Hewildanên dixwazin bidine jibîrkirin rê ji buyerên nû re vedikin.”

Lêkolînêra nasdar Evîn Çîçek di axaftina xwe ya Fransî de, qala hejmarek dokument ji dema jenosîda Dêrsimê kir. Li gorî wan dokumentan hejmara kesên li Dêrsimê hatine kûştin pir gelectir e. Ev yek qet nehatiye eşkerekirin û ji aliyê Kurdan ve jî zêde nayê zanîn. Çîçek li ser hejmara rûniştvanên Dêrsimê zaniyarî da û li ser kesên sirgonkirî analîzek balkêş pêşkêş kir.

Mesaja Sosyolog Dr. Ismail Beşikçi bi Swêdî hate xwendin. Beşikçi di nameya xwe de, li ser daxuyaniya rêvebirên dewleta Turkiyê ya dema pirkûjiya Dêrsimê zaniyarî da. Ji dema qirkirinê, kûştina zarok, keç û xortên Kurda û şeweyê barbariya wan anî zimên. **Buyera Dêrsimê jenosîd e û dive ev yek wisa bê pejirandin.**

Rêz û hurmeta ji bo Mesaja Dr. Beşikçi û şexsê wî, di konferansê de eşkere xuyanî dikir.

Û Dêrsimî qala Dêrsimê dikin

Sê kesên Dêrsimî, Parlemerterê Dêrsimê yê BDP ê Şerafettin Halis, Senarîst û lîstikvan Kemal Görgü û Şahidê pirkûjiya Dêrsimê Elî Gultekin bala beşdarî kişand.

Kemal Görgü di monologa Dêrsimê de, bi zimanek hunerî êşa Dêrsimê bi me re pay kir. Kûla Dêrsimê bi rêya lîstikek şanoyî, û carna bi stiranên pirsê ve girêdayî anî ser nîgargehê. Her peyvek bû wênayek û stiranên wî bû baran û bû hîs û di çavên temaşavan de xuyanî dikir. Zimanê hunerê û hunermandiya Görgü nîşanek eşkere bû ji bo giringiya hunerê di xebata me ya netewî de.

Parlemerterê Dêrsimê Şerafettin Halis bi êşa qûrbanên malbata xwe dest bi axaftina xwe kir. Li ser amadekiriya dewletê jibo pirkûjiyê zaniyarî da. Amadekarî û kîrîna serfermandar û Waliyê herêma Abdullah Alpdogan bi nimuneyan anî zimên. Biryarên dewletê eşkere kir. Paşê jî çend dîmen ji dema pirkûjiyê anî zimên. Pir ecêb e ku, Dêrsim ku bûye qûrbana siyaseta partiya CHP ê, piştî pirkûjiyê demek e dirêj dengên bilind ji Dêrsimê girt. Halis li ser siyaseta AKP ê ya li dijî kurda zaniyarî da. Li ser beyanên rêvebiriya CHP ê rawestiya û axaftina xwe wisa bi dawî anî: **Dêrsim îro bûye pîrsa mirovahiyê, qirkirina li wir pêk hatiye li dijî însanetiye ye û divê mirovahî bê helwest nemîne.**

Eli Gultekin qala dema zaroktiya xwe û qirkirina Dêrsimê kir. **Zarokên hatine windakirin û malbatên hatine kûştin û sirgonkirin.** Li cîhanê, di dîroka gelek gelan de pelên reş û neyênî hene. Lê belê mirov, uzir û lêborîna xwe dixwaze. Mirov xeletiya xwe dihêne zimên. Dide xuyanîkirin ku ew li dijî helwestên wisa neînasnî ne. Lê ev yek qet li cem komara Turkiyê xuyanî nake. Çî niyeta wan tune ye ku xwe bidin guhertin. Hêviya min ew e ku, Dêrsim neyê jibîrkirin û pîrs bibe ya Swêdê û tevayê mirovahiyê...

Dostên Kurda

Serokê Enstîtuya Aşûriyan li Swêdê Jan Bet-Şawoçe bala beşdarî kişand ser taybetiya Dêrsimê ji awira parastina kesên nemihemedî, anku mesîhî û hwd. **Bi saya Dêrsim û xelkê Dêrsimê gelek kes ji kûştinê rizgar bûn. Gelên cewaz hatin Dêrsimê, bûne mêvan û hatin parastin. Paşê bi rêyên cewaz derketin derveyî welêt. Divê Dêrsim neyê jibîrkirin. Pirkûjiya Dêrsimê were rojê navnetewî...**

Partiyên Swêdê bi kesên nasdar beşdarî konferansê bûn. Anders Lago ji sosyal demokatan, Jakob Johnson ji partiya çep, Bodil Ceballos ji ya keskan, Gulan Avci ji ya gel, Fahmi Mahmod ji modaratan û Désiré Pethrus Engström ji mesîhiyên demokatan axaftinên bi wate kirin. Lago, Pethrus û Mahmod bi giranî li ser rewşa Turkiyê û kîrîna li dijî demokrasiyê kur bûn. Lago buyera Dêrsimê weke qirkirinek eşkere nixand. Jonson û Ceballos qirkirina Dêrsimê weke buyerek li dijî însanetiye binav kirin û dê di nava partiyên xwe de pîrsê bihênin rojevê.

Ji partiya gel Gulan Avcî bûyera Dêrsimê weke jenosîda dawî ya Kemal, binav kir. Bi taybetî li ser endametiya Turkiyê ya Yekîtiya Ewropayê-EU mesajên giring da. Avcî, ji EU û Swêdê xwest ku, pirsra Turkiyê ciddî bigirin. Gulan Avcî, bi taybetî helwesta CHP ya jenosîdxwaziye bi hişkî rexne kir û partî û beşdarên konferansê li ser pirsê şiyar kir. Analîza Avcî têra xwe balkêş bû.

Kurdên Swêdê

Di konferansê de, hejmarek Kurdên Swêdê ku di nava partiyên swêdê de çalak in beşdarî konferansê bûn. Yekbûn Alp, Hediye Guzel, Felemez Akad, Amine Kakabaveh beşek ji wan bûn. Serokê Dalkurdê Ramazan Kizil û daxuyaniyên wî bala gelek kesan kişand. Kurdên Feyli, Kurdên Yarsan, Kurdên Êzîdî û Meclîsa Aştiyê li Ewropayê bi mesajên xwe reng dane konferansê. Gelek kes ji rêvebir û endamên dezgehên netewî yê mîna Federasyona Komelên Kurdistanê li Swêdê, Konseya Kurd li Swêdê, Enstîtuya Kurdi li Stockholmê di nava beşdaran de bûn. Hejmarek mezin ji ronakbîrên Kurdan û polîtîkar bi me re bûn.

Mesaj û beşdarî

Prof Dr. Celîlê Celîl ji Viyanayê hatibû û beşdarî kir. Her wisa gelek mesaj ji me re hatin, di nav wana de mesaja serkevtinê ya Federasyona Komelên Êzidiyan, Enstîtuya Kurd ya li Beljîkayê bû. Ji rêvebiriya PEN a Swêdê Firat Cewerî jî cihê xwe di nava beşdaran de girt.

Beyana konferansê

Beyana encamê di bin sê beşan de forma xwe ya dawî girt:

- Buyera li Dêrsimê di 1937-38 an de pêk hat jenodîs bû.
- Konferans qedexekirina DTP ê mehkûm dike û daxwaz dike ku siyasetvanên Kurd yê girtî bêne berdan. Divê biryara dadgeha li dijî serokê Dalkurdê Ramazan Kizil bê hilweşandin.
- CHP bi siyaseta xwe ya neyartiya Kurdayetiye û neteweperestiye li dijî prensîb û nirxên Sosyalist International radiweste û xebatê dike. Divê Sosyalist International partiya CHP ji endametiya xwe derxîne.

Armanca CHAK ê

Armanca Kurdocide Watch-CHAK ê ew e ku, li ser pirsra jenosîdên li dijî Kurd û Kurdistanîyan kur bibe. Pirkûjiyên pêk hatine bi rêya pispor, siyasetvan û kesên têkildar li welêt û derveyî welêt bike cihê niqaşan. Bi rêya şahidên buyerê bike dokument û bibe ber destê dezgehên navnetewî. Pirsra tevkûjiyê bike pirsra mirovahiyê. Ji bo mafê mirovan yê Kurd û Kurdistanîyan xebatê bike.

Kurdocide Watch li 12 welatan niwênertî û komeleyên xwe hene. Li welêt xurt dibe û li derveyî welat jî hêza xwe mezin e. CHAK endamê Dadgeha Navnetewî ya li dijî Sucdarên Şer û hwd ye. Em ê li ser jenosîdên Enfal, Dêrsim û Amûdê û tevayên jenosîdên li Kurdistanê pêk hatine xebatên berfireh bikin. Konferansa Dêrsimê li Stockholmê ne gava me ya yekem li ser tevkûjiya Dêrsimê ye. Destpêk e. Gavên nû hatine plankirin û dê bêne avêtin.

Bê guman e ku CHAK hêza xwe ji Kurd, Kurdistanîyan û dostên xwe digire. Serkevtina me bi saya we ye. Bi me re bin, me bi tenê nehelin, em ê gavên mezintir bi hev re bavêjin û serkevtinan bi dest bixînin. Gelek spas.

Gabar Çiyan

- Cigirê Serokê Giştî yê Kurdocide Watch ê
- Endamê Rêvebir yê Komîteya CHAK Bakur
- Endamê Desteya Ragihandinê ya Navenda CHAK ê

Wêne: EuroKurd News



Konferansa Dêrsimê li Stockholmê



Gulan Avci ji Partiya Gel ya Swêdê



Eli Gultekin diaxife



Parlamentêrê Dêrsimê Şerafettin Halis



Lêkolînêra Kurd Evin Çiçek diaxife